

Komunikadu imprensa rua husi Parlamentu no Governu tuir iha pajina 3-6.

PN aprova proposta-lei enkuadramentu orsamentál iha finál global



Imajen/Media PR.

DILI, 10 janeiru 2022 (TATOLI)—Parlamentu Nasionál (PN), segunda ne'e, aprova proposta-lei enkuadramentu orsamentu estadu no jestaun finanseira públika iha finál globál ho rezultadu votasaun a-favór 37, kontra 0 no abstensaun rua (2).

“Nune'e proposta-lei número 27/V/3a, enkuadramentu orsamentu estadu no jestaun finanseira públika aprova iha finál globál no husu ba Komisaun C Finansa Públika bele trata redasaun finál,” Prezidente Parlamentu Nasionál, Deputadu Aniceto Longuinhos Guterres Lopes, deklara liuhosi plenária, Parlamentu Nasionál.

Bainhira komisaun C ramata halo redasaun sei haruka ba meza Parlamentu nasionál hafoin sei submete ba Prezidente Repúblika hodi halo promulgasaun.

Hafoin votasaun, iha proposta hosi deputadu opozisaun CNRT husu atu halo reabertura ba artigu lima hanesan 8, 9, 10, 11 no 12 maibé parte deputadu CNRT hotu la marka prezensa ka auzente, nune'e meza plenária konsidera proposta rekerimentu ne'e retiradu ona.

Governu liuhosi Ministériu Finansa propoin halo revizaun ba número 3/2009 kona-ba Lei Orsamentu no Jestaun Finanseira (LOGF-sigla português), no iha proposta-lei foun ne'e mantein artigu hamutuk 16, altera artigu hamutuk 22, re-tira artigu 17.

Entretantu proposta-lei foun ne'e aumenta tán artigu 61 kompara ho lei número 13/2009, nune'e proposta-lei foun ne'e iha artigu hamutuk 116 kompara ho artigu 55 iha lei vijente.

Preámbulu hosi proposta-lei foun ne'e introús ho objetivu prinsipál rua mak ajiliza (agilizar) iha jestaun públika no hasa'e transparénsia, responsabilidade, prestasaun konta, kontrolu serbisu no entidade sira iha setór públiku administrativu.

Antes ne'e, Ministru Finansa, Rui Augusto Gomes, esplika razaun halo revizaun tanba iha limitasaun no lákuna, tanba ne'e mak iha proposta-lei foun introdús prinsípiu 11 ne'e kompostu hosi unidade no universidade, anualidade no plurianualidade, estabilidade no sustentabilidade orsamentál, prinsípiu efikásia ekonomia no efisiénsia, transparénsia, responsabilidade, ekidade interjerasionál, programasaun despeza, espesifikasaun no la kompensasaun.

Perímetru orsamentál la'ós de'it iha retratu di'ak ida kompletu kona-ba despeza maibé atu redús despeza públika ba entidade sira-ne'ebé la inklui iha OJE, atu nune'e entidade sira-ne'e bele moris mesak ka auto-sustentabilidade.

Elementu importante ida hosi proposta-lei mak previzaun orsamentasaun por programa, ne'ebé atu vinkula inskrisaun dotasaun ho atividade ne'ebé prevee ona iha planu anuál kada serbisu no entidade, nune'e iha OJE la apresenta de'it despeza maibé tenke hatene mós objetivu atu atinje ho despeza ne'ebé gasta.

“Ita sei halo, kuandu ita reforsa ona relasaun planu no orsamentu mak sei fásil atu halo avaliasaun kona-ba efisiénsia no efikasiasaun despeza públika, no sei obriga servisu no entidade sira-ne'ebé la kumpre objetivu sira-ne'e,” nia dehan.

Nia esplika, orsamentu ida presiza mantein ekilibru entre nesesidade transparénsia ho risku bainhira apresenta informasaun barakliu, sei la inklui sub-programa hotu iha OJE atu evita dokumentu ne'e sa'e boot liután.

Ministru Finansa ne'e fó ezemolu, iha OJE 2021 apresenta de'it programa no iha tabela tolu (3) iha ona pájina 18, no lei ne'e rasik iha pájina 37, karik mak aumenta tán ho sub-programa mak tabela ne'e sei sa'e pájina 81 no lei ne'e rasik sei aumenta ba pájina 100.

“Ho orsamentasaun bazea ba programa ita sei uza orsamentasaun *botton up* no mós kombinasan ho *top down*, *botton up* ida ne'e katak dotasaun orsamentál bazea ba atividade sira-ne'ebé prevee iha planu anuál kada servisu no entidade,” nia dehan.

Jornalista : Nelson de Sousa Editór : Cancio Ximenes



PARLAMENTO
NACIONAL
República Democrática de Timor-Leste

Secretariado-Geral

Direção de Comunicação

Divisão de Relações Públicas, Comunicação e Educação Cívica

Parlamentu Nasionál aprova Lei Enkuadramentu Orsamentu Jerál Estadu no Jestaun Finanseira Públika



Parlamentu Nasionál iha sesaun plenária ordinária iha loron 10 fulan janeiru tinan 2022, aprova ona iha final global ba Proposta Lei n.º 27/V(3ª) – Enkuadramentu Orsamentu Jerál Estadu no Jestaun Finanseira Públika, ho 37 votu a-favor, 0 kontra no 2 abstensaun.

Sesaun plenária ne'e mós halo votu pezar ba matebian Desmond Tutu no Egídio Nogueira ne'ebé hakotu-iis foin lalais ne'e.

Entretantu Saudozu Deputadu Silvino Adolfo Morais hetan ona substituisaun husi Deputadu Luís Geraldo da Costa Oliveira, liu husi sesaun plenária segunda-feira ne'e.

Alem de ne'e, Meza Parlamentu Nasionál mós baixa ba Komisaun B kona-ba Proposta Rezolusaun n.º 5/V(4ª) – *Ratifica, para adesão, a Convenção Internacional sobre Normas de Formação, de Certificação e de Serviço de Quartos para os Marítimos de 1978 (STCW) e respetivas emendas.*

Sesaun plenária ne'e prezide husi Prezidente Parlamentu Nasionál, Aniceto Longuinhos Guterres Lopes, akompañia husi membru Meza no hetan prezensa husi Ministru Asuntu Parlamentares no Komunikaun Sosiál no Ministru Finansas.

=====

Parlamento Nacional

Chefe da Divisão de Relações Públicas, Comunicação e Educação Cívica Agus dos Santos

Email: agus.santos@parlamento.tl Relacoespublicas.dirpec@gmail.com

Lei Enkuadramentu Orsamentu Jerál Estadu Finanseira Públika Aprovadu iha Parlamentu Nasionál

Parlamentu Nasionál (PN) liuhosi sesaun Plenária ohinloron, loron 10 fulan-janeiru 2022, aprova ona iha finál globál Proposta Lei n.º 27/V/3ª – Enkuadramentu Orsamentu Jerál Estadu no Jestaun Finanseira Públika, ho 37 votu A favor, 2 Abstensaun no laiha Kontra.

Ho aprovasaun ne'e, ba oin Komisaun C PN ne'ebé trata asuntu Finansas Públikas sei finaliza redasaun finál hodi submete ba Sua Exelénsia Prezidente Parlamentu Nasionál molok haruka ba Sua Exelénsia Prezidente Repúblika atu tetu.

Ministru Rui Gomes hateten, “ho aprovasaun ne'e signifika katak Timor-Leste halo pasu importante dahuluk iha ámbitu Reforma Jestaun Finanseira Públikas no ita konsege estabelese rejime jurídiku ida bele rezolve defisiénsia oioin iha rejime orsamentál atuál. Iha Lei ne'e rasik, Itaa sei hetan definisaun klaru kona-bá konseitu Perimetru Orsamentál no sei redus rijidez iha Enkuadramentu Orsamentál”.

Lei Enkuadramentu Orsamentál ne'e sei substitui Lei Orsamentu Jestaun Finanseira (LOJF) atuál ne'ebé iha ona vijênsia liu dékada ida nia laran. Alterasaun hirak ne'e importante no urjente atu hatán ba limitasaun sira iha LOJF atuál. Diploma foun ida-ne'e sei revoga Lei n.º 13/2009, (LOJF), 21 Outubru.

Karik Sua Exelénsia Prezidente Repúblika Promulga Lei Enkuadramentu Orsamentál ne'e maka Governu sei prepara Diploma neen (6) atu implementa Lei ne'e rasik.

Proposta Lei Enkuadramentu Orsamentu Jerál Estadu no Jestaun Finanseira Públika hetan aprovasaun iha Jeneralidade iha 6 Jullu tinan 2021, no tuir kedas ho Diskusaun Espesialidade no aprovasaun ba Artigu sira hamutuk 125 iha 13 Agostu 2021.

Sesaun Plenária ba Votasaun Finál Globál ne'e prezide husi Prezidente PN, Sua Exelénsia Aniceto Longuinhos Guterres Lopes, akompaña husi membru sira Meza Parlamentu Nasionál. Apresenta no defende husi Ministru Rui Augusto Gomes no Vise-Ministra Sara Lobo Brites ho ekipa tékniku Gabinete Apoiu Jurídiku, Ministériu Finansas ne'ebé hanesan proponente ba Proposta Lei refere.

Informasaun adisionál balun

Lei Enkuadramentu Orsamentál hanesan rezultadu ida husi prosesu naruk Reforma Jestaun Finanseira Públikas ne'ebé mak inisia ona desde tinan 2015 husi Kintu Governu Konstitusionál no Governu anteriór sira halo ona melloramentu lubun ida liuhusi diskusaun iha tinan barak nia laran.

Lei ne'e introdus prinsípiu orsamentál 11 mak hanesan: Unidade no Universalidade; Anualidade no Plurianualidade; Estabilidade no Sustentabilidade Orsamentál; Ekonomia, Efisiénsia no Efikásia; Transparénsia; Responsabilidade; Ekuidade Interjerasionál; Orsamentasaun pur programas; Espesifikasaun; Naun-Kompensasaun; no ikus-liu mak Naun-Konsignasaun.

Liuhusi Lei ne'e, Governu propoin atu halo mós alterasaun substansiál iha aspeitu balun ne'ebé eseniál tebes ba Enkuadramentu Orsamentu no Jestaun Finanseira Públikas ho objetivu ida mak atu hametin liután relasaun entre planeamentu no orsamentu liuhosi orsamentasaun pur programas ne'ebé foku ba rezultadus.

Desde tinan 2015, Kintu Governu Konstitusionál halo ona servisu advokasia kona-ba Reforma Fiskál no Jestaun Finansas Públikas liuhusi implementasaun fazeadamente orsamentasaun pur programas, eliminasaun prátika desorsamentasaun, hasa'e autonomia servisus no melloramentu transparénsia iha ezekeusaun orsamentu.

Iha tinan 2019, Oitavu Governu Konstitusionál hahú elabora Proposta LEO no submete mai PN iha Janeiru 2021. Durante prosesu preparasaun, elaborasaun no diskusaun Proposta LEO, Governu no Parlamentu Nasionál mós halo ona konsultasaun lubun ida ho setór ekonómiku no setór sosiál sira mak hanesan Banku Sentráil Timor-Leste, RAEOA, Institutu Nasionál Seguransa Sosiál, Câmara de Contas, Konsellu Konsultivu Fundu Petrolíferu, FONGTIL, La'ó Hamutuk no Fundu Monetáriu Internasionál. Proposta LEO ne'e rasik inklui ona rekomendasaun balun ne'ebé mak hato'o ona husi setór ekonómiku no setór sosiál no kumpre ona boa prátika internasionál ne'ebé mak rekomenda husi Relatóriu Ekipa Misaun Artigu IV, Fundu Monetáriu Internasionál no Relatóriu Revizaun ba Despeza Públiku no Akuntabilidade Finanseira husi Banku Mundiál.

(Ministériu Finansas)

url: <http://timor-leste.gov.tl?lang=tp&p=29887>